

Na osnovu Člana 33. Statuta Košarkaškog saveza Bosne i Hercegovine, Upravni odbor KS BiH na svojoj sjednici održanoj 04.07 2023. godine donio je:

**PRAVILNIK
O DISCIPLINSKOJ ODGOVORNOSTI I ZAŠTITI TAKMIČENJA IZ NADLEŽNOSTI
KS BIH**

1. OPŠTE ODREDBE

Član 1.

Pravilnik o disciplinskoj odgovornosti i zaštiti regularnosti košarkaškog takmičenja KS BiH (u daljnjem tekstu: Pravilnik) štiti zdrave sportske odnose, sportski fer plej, sportski moral, ugled, red i disciplinu u košarkaškoj organizaciji Bosne i Hercegovine, propisujući prekršaje i postupak protiv prekršioca čijom su radnjom ili propuštanjem povrijeđeni Statut, odluke i ostala normativna akta KS BiH kao i propisi FIBA i ostale važeće međunarodne konvencije koje se odnose na sport.

Član 2.

- (1) Članovi KS BiH i njihovi oblici organizovanja, svojim opštim aktima uređuju pitanja disciplinske odgovornosti u sopstvenoj sredini.
- (2) Izrečene kazne u organizaciji iz prethodnog stava, ne isključuju disciplinsku odgovornost po ovom pravilniku ili obratno, a izrečena kazna djeluje samo u organizaciji koja je kaznu izrekla.

Član 3.

Ovaj Pravilnik obavezuje cjelokupno članstvo, organe i organizacije u skladu sa članom 10. Statuta KS BiH.

Član 4.

Ne može biti izrečena kazna za prekršaj koji, prije nego što je učinjen, nije bio ovim Pravilnikom, ili nekim drugim aktom, utvrđen kao prekršaj i za koji na isti način nije bila propisana kazna.

Član 5.

Kaznu za učinjeni prekršaj po ovom Pravilniku izriče Disciplinski ili neki drugi nadležan organ, u postupku provedenom po odredbama ovog Pravilnika, Statutom i drugim normativnim aktima i odlukama KS BiH.

Član 6.

Niko ne može biti smatran izvršiocom prekršaja dok se to ne utvrdi pravosnažnom odlukom.

Član 7.

(1) Za prekršaj utvrđen pravosnažnom odlukom, učinjen od bilo kog osnovnog oblika košarkaškog organizovanja u KS BiH, kazniće se odgovorno lice dotičnog organa, a u propisanim slučajevima i organizacija ili organ.

(2) Odgovornim licem smatra se osoba u čijem je djelokrugu nadležnosti učinjen prekršaj, a pod pojmom organizacija ili organ jedan od oblika organizovanja utvrđen Statutom.

(3) Odgovornost odgovornog lica, ili organizacije i organa, postoji ako je do izvršenja prekršaja došlo njegovom radnjom ili propuštanjem i ako je pri tome postupao nehatno.

(4) Odgovornost, ne prestaje prestankom članstva ili funkcije u dotičnom organu ili organizaciji.

2. PREKRŠAJI I ODGOVORNOST

Član 8.

(1) Prekršaj je djelo, činjenja ili nečinjenja, čija su obilježja određena ovim Pravilnikom i ostalim aktima KS BiH.

(2) Odgovornost za prekršaj postoji ako se činjenju ili nečinjenju može pripisati umišljaj ili nehat počinio.

Član 9.

Neće se kazniti za prekršaj onaj koji ga učini u stvarnoj zabludi, nužnoj odbrani ili stanju krajnje nužde.

Član 10.

Za prekršaj odgovara izvršilac prekršaja i podstrekač, kao i pomagač izvršenog prekršaja.

Član 11.

Prekršaj se kažnjava samo ako je tako predviđeno ovim Pravilnikom ili nekim drugim propisom, odnosno dokumentom KS BiH.

Član 12.

Nepoznavanje propisa ne isključuje odgovornost.

3. KAZNE

Član 13.

Izvršiocu prekršaja se mogu izreći sljedeće kazne:

- 1) Opomena,
- 2) Novčana kazna,
- 3) Zabrana prisustva publike na određenom broju utakmica,
- 4) Zabrana igranja određenog broja utakmica na svom terenu,
- 5) Zabrana igranja ili vršenja dužnosti na određenom broju utakmica,
- 6) Vremenska zabrana igranja ili vršenja dužnosti,
- 7) Isključenje iz daljeg toka takmičenja,
- 8) Doživotna diskvalifikacija.

Član 14. Opomena

Opomena se izriče za lakše prekršaje i kada Disciplinski sud ocijeni da će se opomenom postići svrha kažnjavanja.

Član 15. Novčana kazna

- (1) Novčana kazna se može izreći izvršiocu prekršaja i utvrđena je i propisana aktima košarkaške organizacije.
- (2) Visina novčane kazne za lica izriče se u rasponu od 50,00 do 500,00 KM, a za klubove od 100 do 1000,00 KM.
- (3) Prekršilac je obavezan da iznos novčane kazne plati u roku od 15 dana od pravosnažnosti odluke. U protivnom, po isteku ovog roka primjenjuje se suspenzija koja traje do uplate cjelokupnog iznosa kazne.

Član 16. Zabrana pristupa publike na određenom broju utakmica

- (1) Zabrana pristupa publike na određenom broju utakmica primijeniće se kada je za prekršaj utvrđena odgovornost publike, domaćeg ili gostujućeg tima zbog koga je utakmica prekinuta.
- (2) Klub kome je izrečena kazna iz prethodnog stava obavezan je da u vrijeme trajanja kazne u dvorani obezbijedi prisustvo članovima gostujuće ekipe, službenim licima, predstavnicima obezbjeđenja i javnog informisanja.
- (3) Ova vrsta kazne izriče se u rasponu od 1 do 8 utakmica.

Član 17. Kazna zabrane igranja određenog broja utakmica

- (1) Kazna zabrane igranja određenog broja utakmica na svom terenu izriče se klubu za prekršaj, utvrđen pravosnažnom odlukom, koji su učinili njegovi igrači, trener, službeni predstavnici kluba ili domaća publika zbog koga je utakmica prekinuta.
- (2) Dok je pod kaznom iz prethodnog stava klub svoje utakmice može da igra u drugom mjestu u kome postoji registrovana dvorana za rang u kome se kažnjani klub takmiči.
- (3) U mjestu iz prethodnog stava kažnjani klub je domaćin, sa obavezama koje proizilaze iz normativnih akata KS BiH, a koje se odnose na domaćina susreta.
- (4) Ova kazna izriče se u rasponu od 1 do 8 utakmica.

Član 18.

Kazna zabrane igranja ili vršenja dužnosti na određenom broju utakmica

- (1) Kazna zabrane igranja ili vršenja dužnosti na određenom broju utakmica može se izreći za određeni broj utakmica.
- (2) Ova vrsta kazne se izriče u rasponu od 2 do 8 utakmica.

Član 19.

Kazna vremenske zabrane igranja ili vršenja dužnosti

- (1) Kazna vremenske zabrane igranja ili vršenja dužnosti podrazumijeva zabranu za određeni vremenski period i izriče se na pune mjesece ili punu godinu.
- (2) Kazna vremenske zabrane igranja ili vršenja dužnosti, može se izreći kao zabrana na svim vrstama utakmice, utakmicama pojedinih vrsta takmičenja, ili vršenja pojedinih, odnosno, svih dužnosti u utvrđenom vremenskom periodu.
- (3) Kazna vremenske zabrane igranja ili vršenja dužnosti izriče se u trajanju od dva mjeseca do jedne godine, osim suspenzija koje se izriču po osnovu pozitivnog doping testa.
- (4) U slučaju kada se izriče kazna prekršiocu koji još izdržava prethodnu kaznu može se izreći jedinstvena vremenska kazna u trajanju dužem od jedne, ali najduže do dvije godine, i tada mu se objedinjuje preostali period kazne koju izdržava i period novoizrečene kazne.
- (5) Ukoliko prekršilac nakon drugog kažnjavanja učini novi prekršaj, može mu se izreći kazna doživotne diskvalifikacije.

Član 20.

Kazna isključenja iz daljeg toka takmičenja i prebacivanje u niži rang takmičenja

Kazna isključenja iz daljeg toka takmičenja i prebacivanje u niži rang takmičenja izriče se za prekršaje koji su regulisani Službenim pravilima igre ili ako proizvedu naročito teške posljedice.

Član 21.

Kazna doživotne diskvalifikacije

Kazna doživotne diskvalifikacije odnosi se na prekršaje koji su imali osobito teške posljedice, ili se odnosi na ponovljene slučajeve.

Član 22.
Uslovna osuda

- (1) Pri izrečenim kaznama zabrane vršenja dužnosti i novčanim kaznama Disciplinski sud može odložiti izvršenje kazne na vrijeme koje ne može biti kraće od 6 ni duže od 12 mjeseci, s tim da se izrečena kazna neće izvršiti ako okrivljeni u tom roku ne učini novi prekršaj.
- (2) Disciplinski sud će odložiti izvršenje kazne uzimajući u obzir okolnosti pod kojima je izvršen prekršaj, ponašanje izvršioca poslije izvršenog prekršaja, raniji i sadašnji rad u košarkaškoj organizaciji, kao i vlastito ubjeđenje da će samo kažnjavanje postići određenu svrhu.

Član 23.
Obavještavanje Sekretarijata FIBA – e

Izrečene kazne iz članova 19. i 21., a shodno Generalnim pravilima FIBA obavezuju Generalnog sekretara KS BiH da u roku 7 dana po prijemu pravosnažne odluke od disciplinskog organa, obavijesti Sekretarijat FIBA – e kako bi se kazna mogla potvrditi.

4. ODMJERAVANJE KAZNE

Član 24.

Prilikom odmjeravanja kazne uzimaju se u obzir sve okolnosti koje utiču da kazna bude veća ili manja, a naročito težina učinjenog prekršaja i njegove posljedice, pobude iz kojih je učinjen, okolnosti pod kojima je izvršen prekršaj, moralne osobine izvršioca i držanje poslije učinjenog prekršaja.

Član 25.
Otežavajuće okolnosti

Otežavajuće okolnosti postoje kada je prekršaj učinjen u povratku i kada postoje naročito teške posljedice ili druge okolnosti zbog kojih je prekršaj dobio teži oblik.

Član 26.
Olakšavajuće okolnosti

- (1) Olakšavajuće okolnosti postoje kada je izvršilac prije učinjenog prekršaja bio primjernog sportskog ponašanja i morala.
- (2) Priznanje izvršioca prekršaja uvijek je olakšavajuća okolnost.

Član 27.
Ublažavanje kazne

(1) U slučaju kada postoje takve olakšavajuće okolnosti koje ukazuju da se blažom kaznom može postići svrha kažnjavanja, postupajući organ može odrediti kaznu ispod granice predviđene ovim Pravilnikom.

(2) Ublažavanje kazne vrši se tako, što kazna zabrane igranja ili vršenja dužnosti na određenom broju utakmica, kazna vremenske zabrane igranja ili vršenja dužnosti ili novčana kazna, umanjuje najviše do polovine, računajući od minimuma kazne predviđene za taj prekršaj.

Član 28. Povratnici

Učinitelj je u povratku ako je ranije bio kažnjavan za učinjeni prekršaj, a nije proteklo vrijeme više od jedne godine, računajući od dana izdržane kazne.

Član 29. Sticaj

(1) U slučaju odmjeravanja kazne za više prekršaja o kojima se istovremeno odlučuje, prvo se utvrđuje kazna za svaki prekršaj, a potom se donosi odluka o jedinstvenoj kazni prema sljedećem:

- a) ako je za jedan prekršaj utvrđena kazna doživotne diskvalifikacije izriče se samo ta kazna;
- b) više izrečenih kazni vremenske zabrane igranja ili vršenja dužnosti, ili kazne zabrane igranja ili vršenja dužnosti na određenom broju utakmica, spaja se u jednu kaznu koja mora biti manja od zbira izrečenih kazni, a veća od najveće utvrđene kazne;
- c) ako je za jedan prekršaj izrečena kazna vremenske zabrane igranja ili vršenja dužnosti, a za drugi zabrana igranja ili vršenja dužnosti na određenom broju utakmica, tada se utvrđuje jedinstvena vremenska kazna zabrane igranja i vršenja dužnosti.

(2) U slučaju kada se izriče kazna izvršiocu koji već izdržava kaznu, postupajući organ će kaznu koja se izdržava uzeti kao utvrđenu kaznu, odmjeriće kaznu za novi prekršaj, i potom izreći jedinstvenu kaznu s tim što se izdržani dio kazne uračunava u kaznu, odnosno kao dio jedinstvene kazne.

5. ZASTARJELOST POKRETANJA POSTUPKA I OBUSTAVLJANJE POSTUPKA

Član 30. Zastarjelost pokretanja postupka

Pokretanje disciplinskog postupka zastarjeva dva mjeseca od dana izvršenja prekršaja, odnosno jedan mjesec od dana saznanja za izvršeni prekršaj.

Član 31. Obustavljanje postupka

Disciplinski postupak se obustavlja ukoliko u roku od dva mjeseca od dana pokretanja postupka nije donesena pravosnažna odluka.

6. ZASTARJELOST IZVRŠENJA SANKCIJA

Član 32.

- (1) Zastarjevanje izvršenja sankcija počinje da teče od dana kada je odluka postala pravosnažna.
- (2) Lice koje dozvoli da disciplinski postupak ili izrečena kazna zastari podliježe disciplinskoj odgovornosti.

Član 33.

Rokovi zastare izvršenja sankcija

- (1) Izrečena kazna se ne može izvršiti ako je proteklo:
 - a) jedna godina od izricanja kazne zabrane igranja ili vršenja dužnosti na određenom broju utakmica;
 - b) dvije godine od izricanja kazne zabrane igranja ili vršenja dužnosti u trajanju od jedne godine;
 - c) tri godine od izrečene vremenske kazne zabrane igranja ili vršenja dužnosti u trajanju više od jedne godine;
 - d) jedna godina od izrečene novčane kazne.

Član 34.

Brisanje sankcija

- (1) Istekom jedne godine od dana izdržane, oprostene ili zastarjele kazne, kažnjeni se briše iz evidencije kažnjenih.
- (2) Uslovna kazna se briše iz evidencije kažnjenih istekom tri mjeseca od dana isteka vremena na koje je izvršenje odloženo.

7. EVIDENCIJA KAZNI

Član 35.

- (1) Pravosnažne odluke o kazni izrečene od organa koji vodi takmičenje (komesar takmičenja) evidentiraju se u tom organu.
- (2) Evidencija o kaznama izrečenim sudijama i trenerima, pored evidentiranja u organu koji rukovodi takmičenjem, evidentiraju se i u odgovarajućim udruženjima (sudija i trenera).

8. DISCIPLINSKI POSTUPAK I NADLEŽNOST ODLUČIVANJA

Član 36.

Disciplinski postupak se pokreće po prijavi koju može podnijeti svako službeno lice, organ koji vodi takmičenje, klub, organizacija KS BiH ili Disciplinski sud po sopstvenom uvidu ili saznanju o prekršaju.

Član 37.

Odlučivanje u smislu ovog Pravilnika vrši Disciplinski sud KS BiH, te nadležni disciplinski organi članova Saveza i klubova, u okviru svog djelovanja.

Član 38.

- (1) Pri vođenju disciplinskog postupka, učesnici u postupku su obavezni da ispunjavaju zahtjeve disciplinskog organa u cilju utvrđivanja materijalne istine po predmetu koji se rješava.
- (2) Disciplinskom organu pomažu stručni organi i stručni saradnici kojima se može povjeriti i obavljanje pojedinih radnji u postupku neophodnom za donošenje pravilne odluke.

Član 39.

Nakon provedenog postupka i utvrđenog činjeničnog stanja Disciplinski sud donosi po svom slobodnom uvjerenju odluku koja je konačna.

Član 40.

Disciplinski Sud odlučuje pismenom odlukom koja sadrži:

- 1) naziv organa koji je donio odluku i vrijeme donošenja odluke,
- 2) ime, prezime i funkciju lica, odnosno naziv organa na koji se odluka odnosi, - opis prekršaja, - odluka o kazni,
- 3) obrazloženje odluke,
- 4) odluka o troškovima postupka – naknadi za pokretanje postupka,
- 5) pouka o žalbi.

Član 41.

Odluka se dostavlja okrivljenom, klubu ako je njegov igrač kažnjen, podnosiocu prijave, organu koji vodi takmičenje i FIBA (ako se radi o kaznama iz Člana 19. i 21. ovog Pravilnika).

Član 42.

- (1) Na odluku disciplinskog organa o kazni zabrane igranja ili vršenja dužnosti u trajanju od jedne godine ili doživotne diskvalifikacije može se izjaviti žalba.
- (2) Žalba iz prethodnog stava se podnosi Disciplinskom sudu, u roku od 5 dana po dobijanju odluke, s tim što žalba ne zadržava izvršenje odluke.
- (3) Ako žalbu izjavi samo okrivljeni, odluka o kazni ne može se izmijeniti na njegovu štetu.

Član 43.

(1) U slučaju kada postoji osnovana sumnja da je okrivljeni učinio prekršaj za koji se može izreći vremenska kazna zabrane igranja ili vršenja dužnosti ili doživotna diskvalifikacija može se izreći suspenzija.

(2) Suspenziju izriče Disciplinski sud u trajanju 7-14 dana, a odluku o suspenziji pismeno saopštava Generalnom sekretaru koji o tome odmah obavještava suspendovanog.

Član 44.

Odluke o suspenziji i doživotnoj diskvalifikaciji koje donese odgovarajući organ FIBA su obavezujuće za KS BiH.

9. SANKCIJE

Član 45. Opšte sankcije

Član 45a.

Ko ne izvršava odluke organa KS BiH kazniće se vremenskom zabranom igranja ili vršenja dužnosti do jedne godine.

Član 45b.

Ko opstruiše odluke organa KS BiH, djeluje protiv njih neposredno ili posredno, ili na drugi način čini da se ozbiljno ugrozi efikasnost organa kazniće se vremenskom zabranom igranja ili vršenja dužnosti do jedne godine.

Član 45c.

Ko se pozvan pred organ KS BiH, nepristojno i nesportski ponaša kazniće se vremenskom kaznom zabrane igranja ili vršenja dužnosti do jedne godine.

Član 45d.

Ko se uvredljivo izražava, omalovažava ili iznosi ili prenosi neistine o organu KS BiH ili članu košarkaške organizacije kazniće se vremenskom kaznom zabrane igranja ili vršenja dužnosti u trajanju do jedne godine.

Član 45e.

(1) Klub koji ne ispuni svoje obaveze prema KS BiH kazniće se novčanom kaznom, vremenskom kaznom zabrane igranja ili kaznom isključenja iz takmičenja i prebacivanjem u niži rang takmičenja.

(2) Protiv kluba koji podliježe sankcijama iz stava jedan ovog člana prijavu disciplinskom organu podnosi Generalni sekretar KS BiH.

Član 45f.

Ko izjavom ili na drugi način, svjesno dovodi u zabludu organe KS BiH ili članove tih organa, pa se uslijed toga donese odluka koja se u protivnom ne bi donijela kazniće se kaznom zabrane igranja ili vršenja dužnosti do šest mjeseci.

Član 45g.

Ko da lažni iskaz pred organima KS BiH kazniće se zabranom igranja ili vršenja dužnosti u trajanju od šest mjeseci.

Član 45h.

Ko je kažnjen pravosnažnom odlukom ili suspendovan, a javno ili prikriveno obavlja bilo koju funkciju u košarkaškom sportu koja je osporena iskazanom odlukom kazniće se kaznom vremenske zabrane igranja ili vršenja dužnosti u trajanju od najmanje šest mjeseci do godinu dana.

Član 45i.

(1) Ko na bilo koji način krši odredbe Statuta KS BiH ili odredbe 1,3,5 i 6 Evropske povelje o sportu (Savjet Evrope 1992. godine) kazniće se vremenskom kaznom zabrane igranja ili vršenja dužnosti u trajanju od šest mjeseci do jedne godine.

(2) U osobito teškim slučajevima može se izreći doživotna diskvalifikacija.

Član 46.

Sankcije koje se odnose na takmičenje

Za prekršaje u vezi sa takmičenjem i u takmičenju, pored sankcija koje su regulisane Službenim pravilima igre i Propozicijama takmičenja, mogu se izreći i sankcije u skladu sa odredbama ovog Pravilnika.

Član 46a.

(1) Ko nagovara igrača ili funkcionere kluba da klub ne nastupi uopšte ili da napusti igru, odnosno dvoranu kazniće se vremenskom kaznom zabrane igranja ili vršenja dužnosti u trajanju od najmanje tri mjeseca do jedne godine.

(2) Kada je nagovaranje uspjelo može se izreći kazna doživotne diskvalifikacije.

(3) Igrač ili trener koji prihvati nagovaranje iz stava jedan ovoga člana može se kazniti istom kaznom.

Član 46b.

Ko na bilo koji način podstiče, utiče ili učestvuje u namještanju rezultata na košarkaškim utakmicama na kojoj postignuti rezultat nije posljedica sportskog nadmetanja kazniće se

vremenskom zabranom igranja ili vršenja dužnosti u trajanju od najmanje jedne godine do doživotne diskvalifikacije.

Član 46c.

Član košarkaške organizacije koji se nedolično ponaša na košarkaškoj utakmici na kojoj nije u zvaničnoj ulozi, dužnosti ili funkciji kazniće se kaznom vremenske zabrane igranja ili vršenja dužnosti u trajanju do jedne godine.

Član 46d.

Trener, igrači ili zvanični predstavnik ekipe koji nesportskim ponašanjem dovede do prekida igre i utakmica se ne nastavi kazniće se zabranom igranja ili vršenja dužnosti u trajanju do jedne godine.

Član 46e.

Lice koje namjerno podstiče igrače da čine lične greške da bi njegova ekipa ostala sa nedovoljnim brojem igrača za dalju igru i uslijed toga utakmica se prekine kazniće se zabranom igranja ili vršenja dužnosti u trajanju do jedne godine.

Član 46f.

Suspendovani ili kažnjeni trener koji vrši dužnost trenera tako što daje uputstva ekipi, ili rukovodi ekipom direktno ili posredstvom drugog lica, ili na bilo koji drugi način ili sredstvom saraduje sa rukovodstvom ekipe ili ekipom kazniće se zabranom igranja ili vršenja dužnosti u trajanju do jedne godine.

Član 46g.

Zvanično lice na utakmici u čijoj je nadležnosti rješavanje prekršaja iz stava jedan ovog člana i propusti da spriječi takvu radnju kazniće se zabranom igranja ili vršenja dužnosti u trajanju do jedne godine.

Član 46h.

Službeno lice, koje i pored toga što je već bio kažnjavan po tom osnovu, odobri početak utakmice iako organizator nije obezbjedio potrebne uslove i uređaje predviđene takmičarskim propisima kazniće se zabranom vršenja dužnosti u trajanju do jedne godine.

Član 46i.

Sudija ili pomoćni sudija koji prisustvuje utakmici, a odbije zahtjev delegata da sudi ili obavi dužnost pomoćnog sudije na toj utakmici kazniće se zabranom vršenja dužnosti do dva mjeseca.

Član 46j.

- (1) Ko nagovara, obećava poklone ili na neki drugi način utiče na službena lica da svoju dužnost ne vrši u duhu Pravila igre, Propozicija takmičenja ili drugih akata KS BiH kazniće se vremenskom zabranom igranja ili vršenja dužnosti u trajanju od šest do dvanaest mjeseci.
- (2) Ako je nagovaranje uspelo može se izreći doživotna diskvalifikacija.
- (3) Službeno lice koje je prihvatilo nagovaranje, poklon ili obećanje i svoju dužnost obavilo suprotno propisima kazniće se gubitkom prava vršenja dužnosti službenog lica.

Član 46k.

Ko se neopravdano ne odazove pozivu reprezentacije - selekcije ili ko ne ispunjava obaveze iz programa nastupa reprezentacije – selekcije za koju je izabran, a da je već bio u statusu reprezentativca – člana selekcije, kazniće se zabranom igranja ili vršenja dužnosti u trajanju do jedne godine.

Član 47.

Sankcije koje se odnose na nasilje u sportu

Član 47a.

- (1) Član košarkaške organizacije koji vrijeđa, izaziva ili fizički napada igrača, trenera, funkcionera, delegata, sudiju ili gledaoca na košarkaškoj utakmici kazniće se vremenskom zabranom igranja ili vršenja dužnosti u trajanju do jedne godine.
- (2) U osobito teškim slučajevima i ponovljenim slučajevima može se izreći kazna doživotne diskvalifikacije.

Član 47b.

- (1) Klub čiji navijači, shodno Članu 3. Evropske konvencije o nasilju i nedoličnom ponašanju gledalaca na sportskim priredbama, bez obzira da li se utakmica igra na domaćem ili gostujućem terenu, organizovani u grupi ispoljavaju agresivnost koja se ogleda u nesportskom ponašanju, vulgarnom i uvredljivom skandiranju, izricanju prijetnji, fizičkom pokušaju da onemoguće normalan tok utakmice, čineći na taj način svojevrsno nasilje s ciljem da se izazove prekid utakmice, izazovu prekid utakmice ili ugroze ličnu bezbjednost protivničkih igrača ili službenih lica kazniće se vremenskom zabranom igranja utakmica na svom terenu od dva mjeseca do jedne godine.
- (2) U ponovljenom slučaju klub će se kazniti kaznom isključenja iz daljeg toka takmičenja i prebacivanja u niži rang takmičenja za narednu takmičarsku sezonu.

Član 47c.

- (1) Organizator utakmice na kojoj je došlo do nereda kao i lica koja prouzrokuju ili učestvuju u neredu u utakmici kazniće se vremenskom zabranom igranja ili vršenja dužnosti u trajanju do jedne godine.
- (2) U osobito teškim slučajevima i ponovljenim slučajevima može se izreći kazna doživotne diskvalifikacije.

Član 47d.

(1) Ako trener, igrač ili neko od zvaničnih predstavnika kluba fizički napadne protivničkog igrača za vrijeme utakmice kazniće se vremenskom zabranom igranja ili vršenja dužnosti u trajanju do jedne godine.

(2) U osobito teškim slučajevima i ponovljenim slučajevima može se izreći kazna doživotne diskvalifikacije.

Član 47e.

(1) Ko na košarkaškoj utakmici smišljeno povrijedi igrača, sudiju, funkcionera, delegata, a član je košarkaške organizacije kazniće se vremenskom zabranom igranja ili vršenja dužnosti u trajanju do jedne godine.

(2) U osobito teškim slučajevima i ponovljenim slučajevima može se izreći kazna doživotne diskvalifikacije.

(3) Ako je djelo iz stava jedan ovog člana učinjeno van košarkaškog terena, a u vezi je sa nekim događajem na terenu može se izreći analogna kazna.

Član 47f.

(1) Službeno lice koje pokuša da izvrši fizički napad na bilo kog učesnika utakmice ili gledaoca kazniće se vremenskom zabranom igranja ili vršenja dužnosti u trajanju do jedne godine.

(2) U osobito teškim slučajevima i ponovljenim slučajevima može se izreći kazna doživotne diskvalifikacije.

Član 48.

Sankcije koje se odnose na korištenje nedozvoljenih stimulativnih sredstava i doping

Svaki igrač čiji se doping test pokaže pozitivnim podliježe sankcijama.

Član 48a.

(1) Za supstance i metode dopingovanja iz prve i druge kategorije po propisima MOK-a u prvom pokušaju izriče se suspenzija zabrane igranja minimalno dvije godine.

(2) U ponovljenom prekršaju izriče se doživotna diskvalifikacija.

(3) Izuzeci u prvoj kategoriji su efedrin i analogna sredstva.

(4) Efedrin i analogna sredstva su supstance koje se u medicini koriste za liječenje plućnih i ENT oboljenja (rinitis, sinusitis, grip, itd.).

Član 48b.

(1) U pogledu korištenja simpatomimetičkih amina (efedrin, fenilpropanoamin, pseudoefedrin) primjenjivaće se sljedeće sankcije:

(2) U prvom pokušaju ako se sportista izjasnio da je 72 časa prije doping kontrole uzimao medicinska sredstva za liječenje bolesti gornjih disajnih puteva nabrajajući ih u Zvaničnom

izvještaju doping kontrole sankcija će biti zabrana igranja na 1-2 utakmice i opomena klupskom doktoru za propust što sportisti nije pružio odgovarajuću informaciju.

(3) Ako sportista nije dao nikakvu izjavu u Zvaničnom izvještaju doping kontrole sankcija će biti zabrana igranja 1-3 mjeseca i opomena klupskom doktoru za propust što sportisti nije pružio odgovarajuću informaciju.

(4) U drugom pokušaju ako se sportista izjasnio da je uzimao lijekove sankcija će biti zabrana šest mjeseci i opomena klupskom doktoru za propust što sportisti nije pružio odgovarajuću informaciju.

(5) Ako se sportista nije izjasnio da je uzimao lijekove sankcija je minimalna zabrana igranja dvije godine i opomena klupskom doktoru za propust što sportisti nije pružio odgovarajuću informaciju.

(6) U trećem pokušaju sankcija je doživotna diskvalifikacija.

Član 48c.

(1) Korištenje salbutamola, selmeterola i turbutalina je dozvoljeno u inhalaciji za liječenje astme.

(2) U slučaju astmatičnih igrača federacija i FIBA moraju biti unaprijed obaviješteni o propisanoj dozi igrača koji boluje od astme.

(3) Ako obavještenje nije poslato primjenjuju se iste sankcije kao pod članom 48a. stav (1).

Član 48d.

(1) U pogledu treće kategorije sredstava koje podliježu određenim ograničenjima sankcije u prvom pokušaju su minimalana zabrana igranja 1 - 3 mjeseca.

(2) U drugom pokušaju minimalna zabrana igranja je dvije godine.

(3) U trećem pokušaju doživotna diskvalifikacija.

Član 48e.

(1) Korištenje lokalnih anestetika i kortikosteroida mora da bude u granicama opravdanosti liječenja.

(2) Doktor o tome pismeno informiše prije doping kontrole.

(3) Ako nema opravdanosti liječenja igrač podliježe sankcijama iz prethodnog člana.

Član 48f.

Droge koje se uživaju pušenjem (konoplja, marihuana, hašiš) spadaju u kategoriju sredstava koja podliježu određenim ograničenjima i na njih će se primjenjivati sankcije iz člana 48d. Zabrana se primjenjuje na nivo koji je viši od 15 nanograma.

10. PRAVILA I NAČIN RADA DISCIPLINSKOG SUDA

Član 49.

Sastav suda

(1) Članovi Disciplinskog suda imenovani odlukom Upravnog odbora Košarkaškog Saveza BiH, sastaju se na konstituirajućoj sjednici u roku od tri dana od imenovanje.

- (2) Sjednicu otvara i vodi do izbora Predsjednika Disciplinskog suda član sa najdužim radnim iskustvom na pravnim poslovima i u provođenju disciplinskih postupaka.
- (3) Disciplinski sud radi u punom sastavu, a odluke donosi konsenzusom.

Član 50. **Naknada za rad**

- (1) Članovi Disciplinskog suda imaju naknadu za svoj rad.
- (2) Naknada za rad se isplaćuje za konkretan predmet, i ista iznosi 100,00 KM po članu Disciplinskog suda (3x 100,00 KM).
- (3) Naknada se isplaćuje po prijemu zahtjeva za pokretanje disciplinskog postupka, na tekuće račune članova Disciplinskog suda, a po obavijesti koju šalje Predsjednik Disciplinskog suda Generalnom sekretaru Saveza.
- (4) Obavijest iz prethodnog stava sadrži oznaku predmeta, podatke neophodne za uplatu naknade (ime i prezime člana, broj tekućeg računa, banku u kojoj je isti otvoren).

Član 51. **Predsjednik suda**

- (1) Disciplinski sud ima Predsjednika kojeg biraju njegovi članovi.
- (2) Predsjednik Disciplinskog suda od momenta izbora preuzima rukovođenje daljim tokom sjednice.
- (3) Svaki član Disciplinskog suda predlaže za Predsjednika po jednog kandidata - člana Disciplinskog suda, nakon čega se pristupa glasanju po prijedlozima.
- (4) Osnovni kriteriji za izbor Predsjednika Disciplinskog suda su: posjedovanje prethodnog iskustva u vođenju disciplinskog postupka, profesionalno znanje u vođenju postupka (krivični, građanski, upravni).
- (5) Rotacija na mjestu Predsjednika se vrši svakih šesnaest (16) mjeseci.
- (6) Za narednog Predsjednika bira se član koji ima drugo po redu najduže radno iskustvo na pravnim poslovima i u oblasti provođenja disciplinskih postupaka.
- (7) Članovi Disciplinskog suda mogu dogovoriti i drugačiji način izbora Predsjednika od onog predviđenog u stavu (4) i (6).

Član 52. **Ispitivanje valjanosti zahtjeva**

- (1) Disciplinski sud utvrđuje da li zahtjev za pokretanju disciplinskog postupka sadrži sve potrebne podatke, da li je uplaćena naknada za pokretanje postupka, te ispituje njegovu blagovremenost i dopuštenost u smislu Pravilnika.
- (2) Ako Disciplinski sud utvrdi nedostatke u vezi sa prethodnim stavom, zahtjev za pokretanje disciplinskog postupka rješenjem se odbacuje kao nedopušten, neblagovremen ili nepotpun.
- (3) Ako Disciplinski sud utvrdi da zahtjev za pokretanje disciplinskog postupka sadrži sve potrebne podatke, Disciplinski sud utvrđuje da li je nastupila zastarjelost za pokretanje i vođenje disciplinskog postupka.

(4) Ako Disciplinski sud u roku od dva mjeseca od dana pokretanja postupka ne donese pravosnažnu odluku disciplinski postupak se obustavlja zaključkom.

Član 53.

Učešće drugih organa Košarkaškog saveza BiH u provođenju postupka

- (1) Svi organi Saveza su dužni pružiti svu tehničku i stručnu pomoć Disciplinskom sudu radi provođenja disciplinskog postupka.
- (2) Disciplinski sud se po potrebi obraća nadležnim organima Košarkaškog Saveza BiH radi pružanja neophodne tehničke i stručne pomoći za rad Disciplinskog suda.

Član 54.

Odlučivanje po zahtjevu

- (1) Ako Disciplinski sud utvrdi da nije nastupila zastarjelost pokretanja i vođenja disciplinskog postupka, Disciplinski sud nastavlja disciplinski postupak, te poduzima sve neophodne radnje predviđene ovim Pravilnikom u cilju utvrđivanja materijalne istine po predmetu prijave.
- (2) Radnje iz prethodnog stava podrazumijevaju: traženje izjašnjenja od podnosioca zahtjeva, traženje izjašnjenja od prijavljenog, po potrebi i u skladu sa tehničkim mogućnostima zakazivanje javne rasprave i upućivanje poziva za javnu raspravu, te putem stručnih organa Košarkaškog Saveza BiH, Disciplinski sud može tražiti da se pribave sve neophodne informacije radi utvrđivanja pravilnog činjeničnog stanja i donošenja konačne odluke u skladu sa odredbama Pravilnika.

Član 55.

Imenovanje izvjestioca u predmetu

- (1) Disciplinski sud, zaključkom u svakom pojedinačnom predmetu iz svog sastava bira jednog člana – izvjestioca o stanju predmeta.
- (2) Izvjestioca biraju članovi Disciplinskog suda, pri tome vodeći računa o ravnopravnom angažmanu na izvještavanju o svim pristiglim zahtjevima.
- (3) Zaključak iz stava (1) donosi Predsjednik suda.
- (4) Izvjestioc ima zadatak da po prijemu zahtjeva za pokretanje disciplinskog postupka ispita zahtjev u skladu sa članom 52. ovog Pravilnika, te da pred ostale članove Disciplinskog suda sačini prijedlog o poduzimanju daljih neophodnih radnji u predmetu.

Član 56.

Izjašnjenja stranaka

- (1) Stranke u postupku – podnosilac zahtjeva i lice protiv kojeg je usmjeren zahtjev se izjašnjavaju u vezi prijavljenih navoda.
- (2) Pozivi za izjašnjenje strankama u postupku dostavljaju se putem Košarkaškog Saveza BiH, posredstvom stručnih organa, koja izjašnjenja stranke dostavljaju u roku ne dužem od tri (3) dana.

- (3) Stranke svoja izjašnjenja dostavljaju isključivo Disciplinskom sudu, na e-mail adresu: ksbihdisciplinskisud@gmail.com.
- (4) Nedostavljanje izjašnjenja stranaka u postupku ne sprečava Disciplinski sud da provodi dalji tok disciplinskog postupka, te u tom slučaju donosi odluku na osnovu raspoložive dokumentacije, kao i one do koje dođe službenim putem.

Član 57.

Održavanje usmene rasprave

- (1) Ukoliko Disciplinski sud radi sveobuhvatnog utvrđivanja činjeničnog stanja ocijeni potrebnim održavanje usmene rasprave, ista se održava u sjedištu Košarkaškog Saveza BiH, na koju se pozivi, također posredstvom stručnih organa dostavljaju strankama u postupku.
- (2) Troškovi dolaska članova Disciplinskog suda se uračunavaju u troškove postupka na teret stranke koja izgubi spor, i isti se unaprijed isplaćuju od strane Saveza članovima Disciplinskog suda prema važećem troškovniku za putovanja službenih lica na utakmice Prvenstva BiH, iz mjesta iz kojeg dolaze do sjedišta Saveza.
- (3) Održava se jedna usmena rasprava.
- (4) Pozivi stranaka se vrše putem slanja službenog e-maila Košarkaškog Saveza BiH na službenu e-mail adresu organizacije (klub, savez i druga slična organizacija) čiji su prijavljeni i podnosilac zahtjeva za pokretanje disciplinskog postupka članovi.

Član 58.

Vođenje zapisnika o usmenoj raspravi

- (1) O održanoj usmenoj raspravi vodi se zapisnik.
- (2) Tehničku podršku u provođenju usmene rasprave pružaju stručni organi Košarkaškog Saveza BiH
- (3) Tehnička podrška iz prethodnog stava podrazumijeva obezbjeđenje potrebnog materijala, tehničkih pomagala, zapisničara, itd.
- (4) Po zaključenju javne rasprave, zapisnik potpisuje predsjedavajući i zapisničar, nakon čega se članovi Suda povlače na vijećanje i glasanje.

Član 59.

Vijećanje i glasanje

- (1) O vijećanju i glasanju o odgovornosti te disciplinskoj mjeri lica protiv kojeg je pokrenut disciplinski postupak sastavlja se poseban zapisnik koji se stavlja u poseban omot, a potpisuju ga svi članovi Disciplinskog suda.
- (2) U slučaju da Disciplinski sud ocijeni nepotrebnim održavanje usmene rasprave, isti će na sjednici vijeća (telefonskoj) razmotriti svu pribavljenu dokumentaciju, provesti vijećanje i glasanje, o čemu se sačinjava zapisnik o vijećanju i glasanju.
- (3) Zapisnik o vijećanju i glasanju iz prethodnog stava, stavlja se u poseban omot, a potpisuju ga (ili na drugi način daju saglasnost) svi članovi Disciplinskog suda.
- (4) Ukoliko se ne održava sjednica u sjedištu Saveza, vođenje zapisnika se povjerava jednom od članova Disciplinskog suda, koji nije Predsjednik Disciplinskog suda.

Član 60.

Donošenje odluke

- (1) Odluka o odgovornosti prijavljenog se donosi isti dan po održavanju usmene rasprave ili ukoliko ista nije održana, isti dan nakon održavanja sjednice vijeća Disciplinskog suda.
- (2) Odluka Disciplinskog suda donosi se u formi Rješenja i sadrži elemente propisane u članu 8.5. Pravilnika.
- (3) Rok za izradu pismenog opravka Rješenja iz prethodnog stava je tri (3) dana po održavanju usmene rasprave ili sjednice vijeća Disciplinskog suda.

Član 61. **Dostavljanje odluke**

- (1) Odluka se dostavlja okrivljenom, klubu ako je njegov igrač kažnjen, podnosiocu zahtjeva za pokretanje disciplinskog postupka, organu koji vodi takmičenje i FIBA (ako se radi o kaznama iz Člana 19. i 21. ovog Pravilnika).
- (2) Dostavu vrše stručni organi Košarkaškog Saveza BiH.

Član 62. **Vođenje evidencije disciplinskih postupaka i izrečenih sankcija**

Evidencija o disciplinskim predmetima o kojima odlučuje Disciplinski sud vodi se u djelovodniku disciplinskih predmeta kod Košarkaškog Saveza BiH.

11. ŽALBA

Član 63. **Žalba – subjekti i rokovi**

- (1) Nakon provedenog postupka i utvrđenog činjeničnog stanja Disciplinski sud donosi po svom slobodnom uvjerenju odluku koja je konačna.
- (2) Na odluku Disciplinskog suda o kazni zabrane igranja ili vršenja dužnosti u trajanju od jedne godine ili doživotne diskvalifikacije može se izjaviti žalba, u roku od 5 dana.
- (3) Žalba iz prethodnog stava se dostavlja Disciplinskom sudu.

Član 64. **Sadržaj žalbe**

- (1) Žalba treba sadržavati:
 - a) označenje rješenja protiv kojeg se podnosi žalba (broj i datum rješenja),
 - b) osnov za pobijanje rješenja – žalbeni razlog,

c) obrazloženje žalbe,

d) prijedlog da se pobijeno rješenje potpuno ili djelimično ukine ili preinači,

e) potpis osobe koja podnosi žalbu.

(2) U žalbi se mogu iznositi nove činjenice i novi dokazi koji i pored dužne pažnje i opreza nisu mogli biti predstavljeni na sjednici vijeća ili na usmenoj raspravi. Žalitelj je dužan navesti razloge zašto ih ranije nije iznio. Pozivajući se na nove činjenice, žalitelj je dužan navesti dokaze kojima bi se te činjenice imale dokazati, a pozivajući se na nove dokaze – dužan je navesti činjenice koje pomoću tih dokaza želi dokazati.

Član 65. **Žalbeni osnovi**

(1) Rješenje se može pobijati:

a) zbog bitne povrede odredaba disciplinskog postupka,

b) zbog povrede Pravilnika,

c) zbog pogrešno ili nepotpuno utvrđenog činjeničnog stanja,

d) zbog odluke o sankcijama, troškovima disciplinskog postupka, zahtjevu oštećenog u postupku, kao i zbog odluke o objavljivanju rješenja putem sredstava javnog informiranja.

Član 66.

Bitne povrede odredaba disciplinskog postupka

(1) Bitne povrede odredaba disciplinskog postupka postoje:

a) ako je sud bio nepropisno sastavljen,

b) ako je u postupku učestvovao sudija koji se morao izuzeti (ako prijavljeno lice dolazi iz organizacije sa kojom je član Disciplinskog suda – sudija usko povezan, bilo da se radi o košarkaškom sudiji, članu ekipe čiji je član i sam član Disciplinskog suda, itd.)

c) ako je povrijeđeno pravo na odbranu/izjašnjenje prijavljenog,

d) ako sud svojim rješenjem nije potpuno riješio predmet prijave;

e) ako je prijava prekoračena,

k) ako je dispozitiv rješenja nerazumljiv, protivrječan sam sebi ili razlozima rješenja ili ako rješenje uopće ne sadrži razloge ili u njemu nisu navedeni razlozi o odlučnim činjenicama.

(2) Bitna povreda odredaba disciplinskog postupka postoji i ako sud u toku postupka nije primijenio ili je nepravilno primijenio koju odredbu ovog pravilnika, a to je bilo ili je moglo biti od uticaja na pravilno donošenje rješenja.

Član 67.

Povreda odredaba Pravilnika

- (1) Povreda odredaba Pravilnika postoji ako je Pravilnik povrijeđen u pitanju:
- a) da li je radnja koja se okrivljenom stavlja na teret disciplinski prekršaj,
 - b) postoje li okolnosti koje isključuju odgovornost,
 - c) postoje li okolnosti koje isključuju mogućnost vođenja disciplinskog postupka, a naročito da li je nastupila zastarjelost vođenja postupka ili se radi o stvari koja je već pravomoćno i konačno riješena,
 - e) da li je odlukom o kazni ili uvjetnoj osudi, prekoračeno ovlaštenje koje sud ima po pravilniku,

Član 68.

Pogrešno ili nepotpuno utvrđeno činjenično stanje

- (1) Rješenje se može pobijati zbog pogrešno ili nepotpuno utvrđenog činjeničnog stanja kad je sud neku odlučnu činjenicu pogrešno utvrdio ili je nije utvrdio.
- (2) Nepotpuno utvrđeno činjenično stanje postoji i kad na to ukazuju nove činjenice ili novi dokazi.

Član 69.

Odluke o sankciji, troškovima disciplinskog postupka, zahtjevu oštećenog u postupku, kao i zbog odluke o objavljivanju rješenja putem sredstava javnog informiranja

- (1) Rješenje se može pobijati zbog odluke o kazni kad tom odlukom nije prekoračeno ovlaštenje po pravilniku, ali sud nije pravilno odmjerio kaznu, s obzirom na okolnosti koje utiču da kazna bude manja, i zbog toga što je sud primijenio ili nije primijenio odredbe o ublažavanju kazne, iako su za to postojali uvjeti prema Pravilniku.
- (2) Odluka o troškovima disciplinskog postupka se može pobijati ako ne postoji povreda pravilnika uz člana 67. stav 1. tačka e) ali je sud nepravilno donio ovu odluku.
- (3) Odluka o zahtjevu oštećenog, kao i odluka o objavljivanju rješenja putem sredstava javnog informiranja može se pobijati kad je sud o ovim pitanjima donio odluku protivno odredbama pravilnika.

Član 70.

Podnošenje žalbe

- (1) Žalba se podnosi sudu u dovoljnom broju primjeraka za sud, kao i za protivnu stranu - radi davanja odgovora.
- (2) Neblagovremenu, nedopuštenu i izjavljenu od neovlaštene osobe žalbu Disciplinski sud će odbaciti rješenjem.

Član 71.
Odgovor na žalbu

Primjerak žalbe dostavlja se protivnoj stranci koja može u roku od 5 dana od dana prijema podnijeti sudu odgovor na žalbu.

Član 72.
Sudija izvjestitelj

(1) Po prijemu odgovora na žalbu (ukoliko je dostavljen), Predsjednik Disciplinskog suda bira sudiju izvjestitelja u predmetu po žalbi, koji može biti sudija koji je bio izvjestitelj u prvostepenom postupku.

(2) Sudija izvjestitelj može, po potrebi, od sudije, odnosno predsjednika Disciplinskog suda koji je donio pobijenu presudu pribaviti izvještaj o povredama odredaba disciplinskog postupka, a može i provjeriti navode žalbe u pogledu novih dokaza i novih činjenica ili pribaviti potrebne izvještaje ili spise.

(3) Kada sudija izvjestitelj pripremi spis, zakazuje se sjednica vijeća Disciplinskog suda.

Član 73.
Sjednica vijeća i odlučivanje

(1) Na sjednici vijeća razmatra se žalba, kao i odgovor na žalbu (ukoliko je dostavljen).

(2) O sjednici se vodi zapisnik koji se priključuje spisima.

(3) Vijeće odlučuje po provedenim radnjama na sjednici.

(4) Vijeće ispituje pobijano rješenje u onom dijelu u kojem se ono pobija žalbom.

Član 74.
Odluke po žalbi

(1) Disciplinski sud može u sjednici vijeća odbaciti žalbu kao neblagovremenu ili kao nedopuštenu ili odbiti žalbu kao neosnovanu i potvrditi prvostepeno rješenje ili uvažiti žalbu i preinačiti prvostepeno rješenje ili uvažiti žalbu, ukinuti prvostepeno rješenje i po predmetu ponovno odlučivati.

(2) Ako žalbu izjavi samo okrivljeni, odluka o kazni ne može se izmijeniti na njegovu štetu.

Član 75.
Odbacivanje žalbe kao neblagovremene

Žalba će se odbaciti rješenjem kao neblagovremena ako se utvrdi da je podnijeta nakon proteka roka za njeno podnošenje.

Član 76.
Odbacivanje žalbe kao nedopuštene

Žalba će se odbaciti rješenjem kao nedopuštena ako se utvrdi da je žalbu podnijela osoba koja nije ovlaštena za podnošenje žalbe.

Član 77.
Odbijanje žalbe

Disciplinski sud će rješenjem odbiti žalbu kao neosnovanu i potvrditi prvostepeno rješenje kad utvrdi da ne postoje razlozi zbog kojih se rješenje pobija žalbom.

Član 78.
Preinačenje prvostepenog rješenja

Disciplinski sud će, uvažavajući žalbu, rješenjem preinačiti prvostepeno rješenje ako smatra da su odlučne činjenice u prvostepenom rješenju pravilno utvrđene i da se, s obzirom na utvrđeno činjenično stanje, po pravilnoj primjeni pravilnika, ima donijeti drukčije rješenje.

Član 79.
Ukidanje prvostepenog rješenja

(1) Disciplinski sud će, uvažavajući žalbu, rješenjem ukinuti prvostepeno rješenje i u predmetu ponovo odlučivati, ako utvrdi da:

- a) postoji bitna povreda odredaba disciplinskog postupka,
- b) je potrebno izvesti nove dokaze ili ponoviti već u prvostepenom postupku izvedene dokaze uslijed kojih je činjenično stanje pogrešno ili nepotpuno utvrđeno.

Član 80.
Obrazloženje odluke kojom se ukida prvostepeno rješenje

(1) U obrazloženju odluke kojom se ukida prvostepeno rješenje, Disciplinski sud će ocijeniti žalbene navode.

(2) Kada se prvostepeno rješenje ukida zbog bitnih povreda odredaba disciplinskog postupka, u obrazloženju će se navesti koje su odredbe povrijeđene i u čemu se povrede sastoje (član 66.).

(3) Kada se prvostepeno rješenje ukida zbog pogrešno ili nepotpuno utvrđenog činjeničnog stanja, navest će se u čemu se sastoje nedostaci u utvrđivanju činjeničnog stanja, odnosno zašto su novi dokazi i činjenice važni i od uticaja za donošenje pravilne odluke.

Član 81.
Dostavljanje drugostepene odluke

(1) Disciplinski sud će donesenu odluku dostaviti stručnom osoblju Saveza radi predaje strankama i drugim zainteresiranim osobama.

(2) U slučaju ponovnog odlučivanja, Disciplinski sud uzet će za osnovu raniju prijavu.

(3) U novom postupku, stranke mogu isticati nove činjenice i iznositi nove dokaze.

(4) Disciplinski sud je dužan da izvede sve procesne radnje i raspravi sva sporna pitanja za koja je utvrđeno u rješenju o ukidanju prvostepenog rješenja.

12. VANREDNI PRAVNI LIJEK

Član 82.
Zahtjev za ponavljanje postupka

- (1) Ponavljanje postupka se može tražiti:
- a) ako postoji sumnja da je odluka zasnovana na lažnim činjenicama;
 - b) kada se utvrde novi dokazi i činjenice koje ranije nisu bile poznate, a koje bi imale uticaja na odlučivanje.

Član 83.

Lica ovlaštena za podnošenje zahtjeva za ponavljanje postupka

Ponavljanje postupka mogu tražiti: okrivljeni, klub ako je njegov igrač kažnjen i podnosilac prijave.

Član 84.

Rok za podnošenje zahtjeva za ponavljanje postupka

- (1) Zahtjev za ponavljanje postupka podnosi se u roku od 6 mjeseci od dana pravosnažnosti odluke.
- (2) O zahtjevu za ponavljanje postupka odlučuje organ čija se odluka pobija.

Član 85.

Zahtjev za zaštitu primjene akata KS BiH

- (1) Protiv pravosnažne odluke donesene u suprotnosti sa odredbama Statuta i drugih opštih akata KS BiH, može se pokrenuti inicijativa za njihovu zaštitu.
- (2) Inicijativa se u formi zahtjeva podnosi Predsjedniku KS BiH.
- (3) O zahtjevu iz prethodnog stava odlučuje Upravni odbor KS BiH na inicijativu Predsjednika KS BiH.
- (4) Zahtjev za zaštitu prava sadržanih u aktima KS BiH može se odbiti ili usvojiti.
- (5) Ukoliko se zahtjev iz prethodnog stava usvoji, pravosnažna odluka se ukida, a predmet se vraća na ponovno rješavanje i odlučivanje.

Član 86.

Vanredno ublažavanje kazne

- (1) Na osnovu molbe okrivljenog, Skupština KS BiH može okrivljenog osloboditi od daljeg izdržavanja kazne ili kaznu ublažiti, ukoliko postoje okolnosti koje opravdavaju donošenje takve odluke.
- (2) Prilikom odlučivanja u smislu prethodnog stava, uvijek će se cijeniti mišljenje disciplinskog organa koji je donio prethodnu odluku.
- (3) Molba za vanredno ublažavanje kazne može se podnijeti nakon 3 mjeseca od dana pravosnažnosti odluke.

13. TROŠKOVI POSTUPKA

Član 87.

- (1) Naknada za pokretanje postupka po odredbama ovog Pravilnika iznosi 400,00 KM i uplaćuje je pokretač postupka se na žiro račun KS BiH otvoren kod jedne od komercijalnih banaka u Bosni i Hercegovini.
- (2) Ukoliko zahtjev za pokretanje postupka bude uvažen i utvrdi se odgovornost lica protiv lica kojeg se vodi postupak, u odluci će se utvrditi i njegova obaveza o snošenju troškova postupka - naknade za pokretanje postupka (regres prema pokretaču postupka). Ukoliko zahtjev za pokretanje postupka bude odbačen ili odbijen, troškove postupka – naknade snosi pokretač postupka

14. PRIMJENA DRUGIH PROPISA

Član 88. Primjena drugih propisa

O pitanjima disciplinskog postupka pred Disciplinskim sudom, neposredno se primjenjuju odredbe Pravilnika, a u slučaju da neka pitanja nisu regulisana imaju se primijeniti relevantne odredbe Zakona o krivičnom postupku BiH.

15. PRELAZNE I ZAVRŠNE ODREDBE

Član 89.

- (1) Disciplinski postupak započet prije stupanja na snagu ovog Pravilnika koji nije okončan donošenjem odluke o sankciji, nastaviće se prema odredbama onog Pravilnika koji predviđa blažu sankciju.
- (2) Ako je za vođenje disciplinskog postupka započetog prije stupanja na snagu ovog Pravilnika nadležan drugi disciplinski organ, dalje vođenje postupka nastaviće organ nadležan u smislu ovog Pravilnika.
- (3) Odredbe ovog pravilnika usklađene su sa Generalnim pravilima FIBA, Evropskom konvencijom protiv dopingovanja u sportu, Evropskom konvencijom o nasilju i nedoličnom ponašanju gledalaca na sportskim priredbama, Evropskim kodeksom sportske etike i Evropskim apelom za toleranciju i fer plej.
- (4) Disciplinski Sud ima diskreciono pravo da izriče sankcije u slučajevima koji nisu predviđeni ovim Pravilnikom na osnovu analogije, Generalnih propisa FIBA i ostalih normativnih akata KS BiH.
- (5) Tumačenje odredbi ovog Pravilnika daje Upravni odbor KS BiH.
- (6) Upravni odbor KS BiH izdaje obavezna uputstva i tumačenja slučajeva koja nisu predviđena ovim Pravilnikom.
- (7) Ovaj Pravilnik stupa na snagu danom donošenja.
- (8) Usvajanjem ovog Pravilnika prestaju da važe Pravilnik o disciplinskoj odgovornosti i zaštiti takmičenja iz nadležnosti KS BiH iz 2010. godine i Poslovnik o radu Disciplinskog suda KS BiH broj: DS-001/20 od 29.01.2020. godine.

Sarajevo, 04. 09. 2023 godine,

PREDSJEDNIK
Dalibor Miloš